

Mepepeline a tyo ya Mmaci ma Ibrahim

Ucuduwu wa aatagada a nda

Tsu reve vuma na danai mepepeline ma nda shi. U ta gura wo o'wo Bulu aajiya a da dana niyi. Tsu reve ta u ta pe atsuma a Adanshi a Asula adama o uritosu u na u ri na ayi cu'un vu uritosu u na u ri pe atsuma a Adanshi a Asula da. Waru nu ujimu azagbain a aa'isa a usu yi ta fo atsuma a Aatagada a Asula. Za na danai aatagada'a u cuduwa ta cine mayan ma aganda ma aza a Isra'ila mo o'woi iroci ya aganda ya amayun a na ri pe atsuma a Zamawawa.

Za na danai mepepeline ma nda ma damma ta aza e desununa cine Yesu ri na afula. Yesu la'a ta nlingata ma Asula suru. Waru u la'a ta amasula, waru u la'a ta Musa. Ayi da ganu gbain na ri ukalamu shi waru koto u yuwan unusu shi ko ke'en, waru a na u cayi wuma wa yi u ca ta kucci adama o unusu o una u mantsa suru. Ana u kuwai avu u kambu wuma u kpatu'wa ta ure adama ama a tsura ure u na a rawa ubata wa Asula.

E ekere a ama a na e revei adama a kucci atsuma a adini, aatagada a Mmaci ma Ibrahim a ta nu uritosu wu ucira. Yesu Zamawawa zuwa ta kucci suru wo o'wo ili ye pere. Amma gogo ucawu wo okolo atsuma a yi ayi da ili i na i kpatu'wayi ama ure a tyo ubata wa Asula.

Ili i na i ri pe atsuma a aatagada a nda

1. Tsugbain tsa Mawun ma Asula (1:1-4)

2. Yesu la'a ta nlingata ma Asula suru suru (1:5-2:18)
3. Yesu la'a ta Musa na Josuwa (3:1-4:13)
4. Yesu da Ganu Gbain (4:14-7:28)
5. Yesu tawaa ta na nzuwulai n na n la'ai ulobonu (8:1-9:22)
6. Kucci va Yesu u ta u da waru ayi da ne (9:23-10:31)
7. Ama a Asula a na a danai nu ucawu wo okolo (11:1-40)
8. Vu toni iroci ya Yesu Zamawawa (12:1-13:19)
9. Avasa o ukosu ni icasu (13:20-25)

Yesu Zamawawa Mawun ma Asula ma da

¹ De nu ufaru, Asula a yuwusaan ta nkaya n tsu adanshi o una wa amasula na re koko'o.

² Amma a mantasa mo ukosu ma nda, Asula a yuwan ta adanshi na atsu e ekere a Mawun ma yi. Asula a yuwan ta uvaɗi ni ili i na i ri pe atsuma a yi suru e ekere a yi. Ayi da Asula a dangwai wo o'wo za vi ili suru.

³ Mawu'un u roco ta ekan adama a tsugbain tsa Asula, u rotso ta Asula foyi. U zuwa ta ili i lyuwa elime nu ucira wi ikaka ya yi. Ana Mawu'un u kambatoi ama cece atsuma a nusu le, u danu ta o ukere usa'ani wa Asula Mogono me Ili Suru.

Yesu Zamawawa la'a ta nlingata ma Asula

⁴ Ayi Mawu'un u la'a ta nlingata ma Asula lon. Reve Asula a ca yi abajini a aala a na a la'ai ala e le.

⁵ Ili i na i zuwai ayi da Asula a yuwaan nlingata ma Asula adanshi e ili i ro tsa na u yuwayin Mawu'un shi,

“Mawun ma va ma da vu ri.

Ana'an mo o'wo t̄a Dada v̄a wu.”◇

Asul̄a a dammisa t̄a,
 “N to o'wo Dada v̄a yī,
 waru ayi u to o'wo Mawun m̄a v̄a.”

⁶ Ana Asul̄a a shi a cigai u lyungu magaji m̄a yi a tyo o uvadī, u damma t̄a,
 “Nlingata m̄a Asul̄a suru a ciga a 'yuwan a yuwaan yi aganda.” ◇

⁷ Apa ili i na Asul̄a a dammai adama a nlingata m̄a yī,
 “Mo o'woto t̄a nlingata n v̄a tsu upepu.

Mo o'woto t̄a agbashi a v̄a tse elentsu a akina.” ◇

⁸ Agba apa ili i na Asul̄a a dammai adama a Mawun m̄a yī,
 “Avu Asul̄a a da, waru tsugono ts̄a wu ts̄a ri nu ukosu shi.

Vu ta yuwan tsugono nu uge'etosu u na wu ntsayi.

⁹ Vu ciga t̄a ili i mejege reve vu 'yuwan iwuya.
 Ayi da i zuwai Asul̄a, Asul̄a a wu, a dangwa nuwu,
 reve u ca wu tsugbain tsa na tsa zuwa nuwu vu zanganai.

Ayi tsugbain tsa nda u la'a t̄a za na u cayi akapi e le.” ◇

¹⁰ Asul̄a a dammisa t̄a,
 “Zagbain, atsuma o ufaru vu yuwan t̄a uvadī,
 waru ekere a wu a da a yuwain zuva.

¹¹ Mantsa m̄a t̄a taw̄a ana za ro enishe le shi,
 A t̄a kun̄a suru tsa amuna.
 Amma avu vu t̄a dana lo.

¹² Vu t̄a kutsulu le cine a tsu kutsulu akuci a amuna.

A ta vadala tsa akuci e itana.

◇ 1:5 Ica 2:7; 2 Sam. 7:14. ◇ 1:6 U.Wl. 32:43. ◇ 1:7 Ica 104:4.

◇ 1:9 Ica 45:6-7.

Amma avu gba ne da vaa dana kuci mantsa suru,
wuma wa wu waru woo koto shi.” ◇

¹³ Asula a yuwaan nlingata ma yi adanshi cine u
yuwayin Mawun ma yi shi,

“Danu pa o ukere usa'ani u va

she na n zuwa n'yuwatan

ma wu mo o'wo uzuwata wa ana a wu.” ◇

¹⁴ Nlingata ma Asula† suru nan ruhu da na aa
yuwusaan Asula aganda, waru u lyungu le ta tsara
a kamba aza a na aa ushi iwawi.†

2

Iwawi i tsu i ta mgbain

¹ Adama o ndolo na tsu ciga tsu 'yuwan tsu dashi
yuwain ugbozu tsu kuruyi amayun a na o roco
ntsu. Na tsu yuwan ne tsaa puwaan shi.

² O roco ta a na ikaka'a i na Asula a cayi nlingata
ma Asula a ca nkaya n tsu amayun a da. Waru za
na biti kuru niyi shi, ko za na 'yuwan niyi u ta ushi
atsumalima a na a ntsayi ili i na u yuwain.

³ Nye i da yaa zuwa tsu tsu danai a majiyan tsu
ta la'a na tsu 'yuwan a ushi iwawi† i gbain i nda?
Zagbain da fara yuwain adanshi e iwawi i nda
na aciyayi, reve aza a na a uwwa niyi o roco tsu
amayun a da.

⁴ Asula na aciyayi u roco ta a na ikaka ya yi
amayun a da, ana u yuwain linga va asalama ni
iroci yu ucira icu'un icu'un. Waru u ca ta Ruhu va
Akiza a za suru na u dangwai.

Za na o rocosu tsu ure wi iwawi

◇ **1:12** Ica 102:25-27. ◇ **1:13** Ica 110:1.

⁵ Asulā a ɗangwa nlingata mā yi n yuwan tsugono tsu uvadi u sa'avu u na u ri lo a tawā shi, ayi ɗa ili i na tsaā yuwusan adanshi a yi.

⁶ Ununa a ɗanai aṭsuma Adanshi a Asulā ubata u ro,

“Nye i zuwai vu ri aɗa a vadilima?

Nye i zuwai vu ri aɗa a mawun ma vuma?

⁷ A mantsa ma wa'a vu zuwa ta ucira wa yi* u kalama ucira wu nlingata ma Asulā, reve vu katala yi ookokolo na tsugbain nu ucira.

⁸ Reve vu zuwa yi u yuwan tsugono tsi ili biti.” ◇

Ana Asulā a zuwa niyi mogono me ili biti, ko ili yi lo i buwai i na waa yuwusan tsugono tsa yi shi shi. Agba koto ne'en tse ene ili i nda i fara shi.

⁹ Ili i na tsee inda ayi ɗa Yesu, za na a mantsa wa'a ucira wa yi u shi u rawa za vu nlingata ma Asulā shi. Agba gogo a katala yi ta ookokolo nu ucira na tsugbain, adama a na u sowoi aṭsumalima o ukwa o unā u tsu. Amayun adama e isa'ani ya Asulā i ɗa, Yesu kuwai o unā wa koyan ɗa o uvadi.

¹⁰ Asulā a ɗa a yuwain ili biti, waru ili biti adama a na a ca yi tsugbain tsa ɗa. U ciga ta muwun na abunda a uwa ubata u tsugbain tsa yi. Adama o ndolo a ɗa u zuwai Yesu sowoi aṭsumalima, ne ɗa u zuwai Yesu ntsayi tsara u roco ama ure wi iwawi.

¹¹ Adama o ndolo, Yesu na aza a na waa kambatosu aza a akiza a ta na Dada ta. Ayi ɗa i zuwai Yesu ri o wono u na wee de le azawawa'a a yi shi.

* **2:7** Akuci a atagada na abunda a dashi ta: Vu zuwa yi ta wo o'wo mogono a aci e ili i na vu yuwain suru. ◇ **2:8** Ica 8:4-6.

12 U damma ta Asulā,
 “N ta damma ama a va ili i na vu yuwain.
 N ta cuwa wu no o boloto na aa yuwan aganda.” ◇

13 Waru u damma ta,
 “N ta zuwaa Asulā ucira.”
 Reve u damma,
 “Amu da nda obolo na muwun n na Asulā a ca
 numu.” ◇

14 Ama a Asulā ama a da na lipu na mpasa,
 adama a nda Yesu na aciyayi wo o'wo ta unata ne
 ele. U yuwan ta ne adama a na nu ukwa wa yi u to
 kototo Mekerencesu, za na ri nu ucira wu ukwa.

15 Ne da u badai aza a na a shi agbashi o wovon
 wu ukwa a wuma u le suru suru.

16 Suru ntsu tsu reve ta a na Yesu tawa ta adama
 u kamba mmaci ma Ibrahim, amma u kamba
 nlingata ma Asulā shi.

17 Adama o ndolo a da Asulā a zuwai Yesu u rotso
 ama a yi suru suru, adama wo o'wo aabara a nan
 ganu lo za na oo rocosu isa'ani, za na Asulā a cayi
 okolo suru suru. Ne da waa gura ca Asulā kucci
 adama Asulā a yuwaan ama gafura vu unusu u le.

18 Ayi na aciyayi u sowo ta atsumalima, waru
 Mekerencesu ma yuwan ta mpolo n na waa zuwa
 yi u nusan. Adama o ndolo gogo u ta gura kamba
 aza a na Mekerencesu ma ri o mpolo u zuwa le a
 yuwan unusu.

3

Yesu la'a ta Musa

1 Ama a va, Asulā a dangwa fu ta yo o'wo ama a
 akiza a yi. Adama o ndolo i yuwusan majiyan cine

Yesu ri aajiya a Asulā, waru ayi da aabara a nan ganu vu ucawu wo okolo a tsu.

² U yuwan ta abulā e ili i na Asulā a dangwa niyi u yuwan suru, cine Musa yuwain abulā e ili i na Asulā a damma niyi u yuwan suru, atsuma a tsugbain tsa yi va aza a Isra'ila.*

³ Yesu tsura ta tsugbain tsa na tsa la'ai za va Musa, cine suwi tsu tsura tsugbain tsa na tsa la'ai usaa u na u yuwain.

⁴ Amayun a da ozo o ro da a suwai 'wa'a suru, amma Asulā a da suwi vi ili suru.

⁵ Asulā a lyawa ta u'wa wa yi e ekere a Musa, adama a na Musa aagbashi a abulā a da a na a zuwaa ucira, waru iroci i da i na Asulā oo roco elime.

⁶ Zamawawa† gba waru Mawun ma Asulā ma da, ayi da za na Asulā a lyawayi u'wa wa yi. Atsu da u'wa wa yi na tsu lyuwa elime na matsura mo okolo ugbamu, waru na tsu zuwa ucira o uzuwu wo okolo a tsu ya'a yi.

Tsu 'yuwan tsu ciga tsu lyuwai elime ni itoni ya Asulā

⁷ U ta cine Ruhu va Akiza dammai,

“Na yu uwua uɗyo wa Asulā ana'an,

⁸ she i danā na aciyogbamu

cine nkaya n du n danai wan,

ana a vadalayi Asulā ucina,

a mantsa ma na a lyungwai Asulā o ogozo.

⁹ Asulā a damma ta,

‘Reve a lyungwa mu,

adama e ene ili i na maa yuwan,

* **3:2** Na Tseheleni idanshi “U'wa wa Asulā” urevu wa yi u da “Aza a Isra'ila.”

ko na wo o'woi e ene ta ili i na n yuwain
atsuma a a'wan amunga.

¹⁰ Adama o ndolo n yuwan ta upan ne ele lon,
reve n damma:

“Okolo e le a tsu dana ta alanga na amu.

Waru a 'yuwan ta a yuwan ili i na n damma nle a
yuwan.”

¹¹ N yuwan ta upan reve n kucinaa le,

“Aa uwa ubata u wivuwun u va shi, ko ke'en.” ’ ’ ’ ’ ◇

¹² Ama a va, i yuwan ugbozu adama she za ta du
dana no okolo e iwuya, a na waa 'yasan du a ca
okolo wan. Icu'un yo okolo o ndolo a tsu vadala
du ta diga ubata wa Asula a wuma.

¹³ I dashilai okolo ugbamu urana suru. Waru i
lyuwa elime na mayan ne n de nu urana wu lo. Ni
i yuwan ne shi, unusu u ta pusaan ozo o ro a du a
na e reme a zuwa le atsuma a aza a aciyogbamu.

¹⁴ Atsu tsu to obolo na Kristi Zamawawa na tsu
lyuwa elime hali a tyo o ukosu nu ucawu wo okolo
o ugbamu u na tsu ri na ayi diga o ufaru.

¹⁵ Adanshi Asula a damma ta,
“Na yu uwwa udyo wa Asula ana'an,
she i dana na aciyogbamu,
cine nkaya n du n dana wan
ana a vadala yi Asula ucina.”

¹⁶ Nan zane da a uwwai udyo wa Asula'a reve
a yuwaan yi aciyogbamu? Ele da aza a na Musa
utayi atsuma a Masar suru.

¹⁷ Nan zane da waru Asula a yuwain upan ne ele
atsuma a a'wan amunga? Ele da aza a na a yuwain
unusu, aza a na a kuwai atsuma o ogozo.

18 Waru nan zane da Asulā a yuwusain adanshi ana u kucinai na aa uwa ubaṭa u wivuwun wa yi shi? Aza a na a 'yuwain a yuwaan yi tsutoni da.

19 Tsu taṭaṭa tsu reve a na aa gura uwa ubaṭa u wivuwu'un shi, adama a na a 'yuwan ta a usu.

4

Nzuwulai mu ubaṭa u wivuwun

1 Asulā a yuwaan tsu ta nzuwulai n na tsa'a gura uwa ubaṭa u wivuwun wa yi. Adama o ndolo, tsu yuwain ugbozu suru ntsu adama ko za ta tsu kuḍa a uwa pe wan.

2 Tsu uwwa ta ikaka ya Alabari a Sa'ani'i, cine ele aza a Isra'ila fo a uwwa niyi. Amma reve a 'yuwan a ca okolo e ili i na a uwwai, waru ikaka'a i kamba le shi.

3 Atsu na tsu usuyi atsu da goon tsa'a uwa ubaṭa u wivuwun wa yi. Cine Asulā a dammai,

“N yuwan ta upan reve n kucina,
‘Aa uwa ubaṭa u wivuwun u va shi, ko ke'en!’ ” ◇

U damma ta ili i nda ko a na u foboi de ubaṭa u wivuwun wa yi diga na u yuwain uvadi.

4 Atsuma a Adanshi a Asulā, u yuwan ta adanshi adama o urana we cindere wa ajuma, u damma ta: “O urana we cindere Asulā e ivuwan ta atsuma a linga va yi suru.” ◇

5 Waru tsu de ta nu unā a mantsa mo ro u damma, “Ama a nda aa uwa ubaṭa u wivuwun u va shi!” ◇

6 Ele aza a na a fara uwwai ikaka i nda, a tsura a uwa ubaṭa u wivuwun u nda shi, adama a na a

kudāi a kuru. Agba amayun a dā ama o ro a ta uwa ubāta u wivuwun wā Asulā'a.

⁷ Adama o ndolo Asulā a zuwa tā mantsa mo ro a na ama aa uwa ubāta u wivuwun wā yi, mantsa mo ndolo ma dā u deyi, “Ana'an.” Asulā a yuwan tā adanshi e ekere a Dawuda nā acaṣa cina a jima e idanshi i na a yuwain de adanshi, “Nā yu uwwa uḍyo wā Asulā ana'an, she i dānā na aciyogbamu wan.” ◇

⁸ Josuwa† tara le tā a tyo e idā ya Ka'ana,† agba ayi dāda ubāta u wivuwu'un shi. Nā Ka'ana dāda shi ubāta u wivuwu'un, Asulā a shi a dashi yuwisan adanshi o urana u wivuwusan u ro shi.

⁹ Ayi nda to rocosu a na mantsa mā wivuwun ma ama a yi koto ma yuwan shi. Mantsa mā wivuwun ma nda u tā gashi wivuwun u na Asulā a yuwain o urana we cindere.

¹⁰ Za na uwai ubāta u wivuwun wā Asulā suru, u te ivuwan nu ulinga wā yi, cine Asulā e ivuwain ana u kotoi mayan mo uvadi.

¹¹ Tsu yuwain ukadu tsu uwai ubāta u wivuwun wā Asulā, adama she za tā tsu kudā a uwa wan, cine ele a yuwain adama a na a 'yuwain a yuwan tsutoni.

¹² Ikaka ya Asulā i tā gashi ili i ro i na i ri wuma waru i ri nu ucira. U la'a tā matsun me pe'eni ma na e tewein nā re vā yi wali. U tsu bātsala ntsu tā a uwa pe, aṣumā a asuvu a tsu nā majiyan mā tsu. Waru u tsu paḍa tā a uwa e memere mā alata e etele a tsu hali u bātsalai laka. U tsu roco tā a alanga e eteshe ili i na tsu sokoi pe, ele dā ili i na tsu tsu jiyān ni ili i na tsu cigai.

◇ 4:7 Ica 95:11.

¹³ Za lo a gura soko ili i ro atsuma o uvadi i na Asula ee ene shi. U tse ene ta ili suru cine u ri. Ayi da Asula a na na tsu 'yuwan tsu ciga tsu cuɗuwa yi ili i na tsu yuwain suru.

Yesu da aabara a nan ganu a tsu

¹⁴ Tsu lyuwai elime na maguza me ili i na tsa dansa tsu usuyi. Tsu yuwain ne adama a na tsu ta na aabara a nan ganu, Yesu Mawun ma Asula, za na karai a tyo zuva.

¹⁵ U gura ta reve na tsu ri babu ucira. Mekerenkesu ma yuwan ta ukadu u na waa zuwa yi u yuwan unusu cine waa yuwusan ukadu u zuwa tsu mayan mo unusu, agba Zamawawa yuwan unusu shi.

¹⁶ Adama o ndolo tsu rawai zuzu no ootogu o tsugono tsu Asula babu wovon. Ayi da za na o rocosu ama isa'ani. Na tsu yuwain ne, tsu ta tsurai isa'ani e ekere a yi, reve u kamba tsu a mantsa ma na tsu cigai ikambi.

5

¹ Asula a tsu dangwa ta aabara a nan ganu suru atsuma a ama, reve u ca yi ulinga u na waa 'yawa a makakan ma yi o una wa ama a na waa casu ne'e na kucci adama o unusu.

² Aabara a nan ganu a ri nu ucira shi, u ta tsa akapi a ama. Ayi da i zuwai woo tono ben na aza a na a yuwusan unusu adama a na a ri nu urevu shi.

³ Adama a na u ri nu ucira shi, u ciga u 'yuwan u ca kucci adama a nusu va yi waru adama a nusu va ama a yi.

⁴ Babu vuma na aa gura ca aciyayi tsugbain adama wo o'wo aabara a nan ganu. Vuma tso o'wo ta aabara a nan ganu na Asula e de yi, cine u deyi Haruna.†

⁵ Ne da u danai e ekere a Zamawawa. Ana wo o'woi aabara a nan ganu, adama a na u dangulai aciyayi wo o'wo na tsugbain tsa da da shi. Asula a da a damma niyi,
“Mawun ma va ma da vu ri.
Ana'an mo o'wo ta Dada va wu.” ◇

⁶ Ubatu u ro reve Asula a damma,
“Avu ganu† babu ukotu da,
cine Malkisada† danai ganu.” ◇

⁷ Asula a ta nu ucira u na waa wawa Yesu Zamawawa ubatu o ukwa. Ana Yesu danai atsuma o uvadi u nda, u pati ta Asula ni yisaali obolo na abara tsara u wawa yi. Na amayun a da u yuwayin Asula tsutoni, reve gba, Asula a zuwaa yi atsuvu e ipati ya yi.

⁸ Ko na wo o'woi Yesu Zamawawa Mawun ma Asula ma da, atsumalima a na u sowoi u rito yi ta u yuwan tsutoni e ekere e ili'i.

⁹ Ana u kotoi ili i na wu ntsayi u yuwan suru, wo o'wo ta za na a zuwa ama a tsura iwawi i babu ukotu, aza a na a yuwusan ili i na u damma nle a yuwan.

¹⁰ O ure u nda u da Asula a zuwa niyi wo o'woi aabara a nan ganu, ganu oroci a Malkisada.

She i lyawa itoni ya Asula wan

¹¹ Tsu ta ni ili i na tsaa damma na abunda adama e ili i nda, amma u tu usan u na tsaa cu duwa adama a na i tsu reve ili go'o shi.

◇ 5:5 Ica 2:7. ◇ 5:6 Ufr. 14:17-24; Ica 110:4.

¹² Yo o'wo ta aza e Itoni nu ujimu, waru u to lobono i dana o ritosu akapi. Amma i ciga ta nanza ritosu du ikaka yu ufaru ya adanshi a Asula. I ta gashi ibaba i na ya apasa maani, agba i rawa ta na i shi a lyuwa tsuwa.

¹³ Vuma na buwai a yapu i maani waa gura kakasa isa'ani ni iwuya shi.

¹⁴ Amma ama a na o gbozoi a ta lyuwusa tsuwa tsa na ibaba yaa lyuwa shi, waru o ritosu ta de cine aa kakasa iwuya ni isa'ani.

6

¹⁻³ O ufaru i rito ta uritosu wu ufaru, aza a na a ntsayi ibaba. Ritosu n nda ele da tsu vadalai a nusu tsu na tsu tawaa nu ukwa, waru tsu dana i nu ucawu wo okolo e ekere a Asula. Ele da waru uritosu adama o urumbusu na mazuwa me ekere. Nu uritosu adama o u'yosun diga o ukwa, na adama o uge'etosu u babu ukotu, a ta pe atsuma o uritosu wu ufaru. Amma i reve ta de ili i ndolo. Adama o ndolo, tsaa yuwan adanshi adama e le shi. Amma na Asula a kamba tsu, tsu ta kambuwa ugbozu adama tsu rito ili i na yi ntsayi aza a na a kungwai de.

⁴ No ozo o ro a lyawa itoni yi Zamawawa, ko za lo aa gura zuwa le a vadala a nusu le waru shi. De nu ufaru, ama a nda a shi ta e ekan a Asula waru e pede ta une'e wa yi. Ele obolo no ozo o ro a ushi ta Ruhu va Akiza.

⁵ E reve ta cine ikaka ya Asula i ri ulobonu, waru a ushi ta ucira u mantsa ma na Asula aa dana a yuwusan tsugono.

⁶ Ana a ushiyi ili i ndolo suru, reve a vadala Zamawawa ucina. U ri n yuwan a kambatowisa

icu'un ya ama o ndolo a vadalisa shi adama a na a ta varasa Mawun ma Asula a akpata† waru reve a 'yuwan yi. A ta zuwusa yi o wono a makakan ma ama.

⁷ Ama o ro a ta gashi ida i na i tsu tsura mini ma abunda. Reve u tawaa na limatan va aduma lon e ekere a aza a na a cimbusa yi. Asula a tsu zuwaa ta ida i ndolo aba'un.

⁸ Ozo o ro gba shi a ta gashi ida i na i tsu kungwato awanda na anlya a vama agba a tsu matsan ili shi. Asula a tsu yuwaan ta ida'a una, reve waru akina a lungusa yi suru suru.

⁹ Ama a va a na n cigai, ko na tsu yuwan adanshi tsunda, tsu dama adama a du shi. Tsu reve ta a na i ri o ure u sa'ani, ure wi iwawi.

¹⁰ Asula a tsu ge'eto ta cine u tsu ntsaa. U ta cuwan na linga na vu yuwain, waru u ta cuwan ni icigi i na vu roco niyi ana vu kambai ama a yi. Waru u ta cuwan a na vu buwai a kambusa le hali n gogo.

¹¹ Ili i na tsu la'a cigai ayi da, i lyuwa elime na mayan ne hali a tyo o ukosu, adama a na i ta reve ili i sa'ani i na i ri a zuwusa okolo'o u too o'wo amayun.

¹² Tsu ciga du yo o'wo orogo shi. Amma, i kuru iroci ya aza a na a ushiyi ili i na Asula a yuwain nzuwulai adama o ucawu wo okolo na ankuri e le.

Asula a tsu yuwan ta ili i na u yuwain nzuwulai

¹³ Ana Asula a yuwayin Ibrahim† nzuwulai, u kucina ta na waa yuwan ili i na u yuwain nzuwulai. U yuwan ta akucunu a nda na ala a yi, adama a na babu lo za na la'ai Asula.

¹⁴ U damma t̄a, “Amu Asulazuva, n ta zuwaa wu aba'un, waru n ta ca wu mmaci mā abunda!” ◇

¹⁵ Ibrahim yuwan t̄a ipiri na ankuri adama ili i nda i fara, reve u ushi ili i na Asulā a yuwaan niyi nzuwulai'i.

¹⁶ Na ama a yuwan akucunu, a tsu kucina t̄a na aala a za na la'a nle. Akucunu'u o roco t̄a ili i na a dammai amayun a da, waru u tsi isawaton t̄a mawasan.

¹⁷ Asulā fo u yuwan t̄a akucunu, adama aza a na aa usu nzuwulai e reve a na amayun a da a na u tsu vadala ifoḅi ya yi shi.

¹⁸ Ili i re i nda i ri n vadala shi: Asulā a tsu yuwan epen shi nu u yuwan nzuwulai, waru waa yuwan epen na akucunu a na u yuwain shi. Ili i nda i t̄a dashishi tsu okolo ugbamu ātsu na tsa a sumusa a tyo ubāt̄a wā Asulā adama u kede tsu. U t̄a dashishi tsu ucira adama tsu guzā uzuwu wo okolo u na u ca ntsu.

¹⁹⁻²⁰ Uzuwu wo okolo o ndolo u tu ugbamu o okolo ā tsu, cine rumu wantsun tsi isawaton wantsun ubāt̄a u t̄a. Vuma na ya'ā yi da tsa a zuwusa uzuwu wo okolo ā tsu ayi da Yesu, za na uwulai nu umuna a tyo Upasu u na u La'ai Akiza† zuva. U yuwaan tsu t̄a ne. Wo o'wo t̄a aabara a nan ganu a babu ukotu, ganu oroci a Malkisada.†

7

Ganu Malkisada

¹ Malkisada† n nda ayi da u danai mogono mā lyuci va Salem waru ganu Mogono mā Asulā ma da. Ana Ibrahim† unai ngono n nashi ayi a makambāa o u'wa, avu Malkisada kara o uta u

◇ 6:14 Ufr. 22:17.

ga'an nā ayi reve u zuwaa yi aba'un. ◇ ² Reve Ibrahim ca yi za t̄a ̄atsumā a kupa e ili suru a na u kambayi diga ubātā o uvon. Ili yu ufaru i na tsu cigai tsu damma adama a Malkisada, ayi da urevu wa aala ā yi, “mogono ma na maa yuwusan ili yā ābulā.” Ayi da waru “mogono ma asuvu nden” adama a na Salem t̄a nu urevu “asuvu nden.”

³ Babu za na revei dada ko mma va Malkisada, ko ubātā u na wu utai, ko mantsa ma na a matsan niyi, ko mantsa ma na u kuwai. U t̄a gashi Mawun mā Asulā waru ganu da babu ukotu.

⁴ I kalyuwā cine Malkisada danai nā tsugbain! Ko Ibrahim, akaya a gbain a Isra'ila, u reve t̄a cine Malkisada danai nā tsugbain ana u ca niyi za t̄a ̄atsumā a kupa ̄atsumā e ili i na u kambayi diga o uvon.

⁵ Wilā u rito t̄a mmaci ma Ibrahim a 'yuwan a ciga a ca aza a na ā ri ̄atsumā a mmaci mā Levi aza a na ā ri nan ganu za t̄a ̄atsumā a kupa e ili i na ā tsurai, ko na shi wo o'wo edenge e le a da.

⁶ Malkisada diga e elentsu ā Levi a da shi, agba u ushi t̄a za t̄a ̄atsumā a kupa ya Ibrahim. Reve u zuwaa Ibrahim aba'un, za na ushiyi de nzuwulai mā Asulā.

⁷ Za suru reve t̄a vuma na ri nu ucira u na waa zuwaa za ro aba'un, u la'a t̄a za vu u ushishi wa aba'u'un ābundā lon.

⁸ Nan ganu ā tsu ushi t̄a za t̄a ̄atsumā a kupa e ili i na ama ā tsurai, ko na wo o'woi ele ama a da a na āā kuwā. Amma Malkisada la'a t̄a cine ā ri, adama a na Adanshi ā Asulā o rito t̄a u t̄a wuma.

⁹ Tsu ta gura damma mmaci mā Levi, aza a na ā tsu ushi za t̄a ̄atsumā a kupa, ele fo a tsu ca t̄a ana

◇ 7:1 Ufr. 14:17-20.

Ibrahim cayi Malkisada za t̄a ʔtsumā a kupa.

¹⁰ Koto ʔ shi a matsan Levi shi, amma u ɗanā t̄a lo ʔtsumā a akaya ʔ yi Ibrahim, ana Malkisada ga'ain nā ʔyi.

¹¹ Ko na wo o'woi Wil̄a wa Musa u damma t̄a a na nan ganu a 'yuwan a ciga ʔ ɗanā mmaci mā Levi, nan ganu a nda aa gura kambato ko za o o'wo wuntsayi shi. Ili i na a lambai ʔyi ɗa ganu tsa ganu Malkisada, ganu na ut̄ai o u'wa wa Haruna shi.

¹² Waru nā cu'un va ganu ro ko'o t̄awā, na a 'yuwan a ciga Wil̄a'ʔ u vadala fo.

¹³ Tsu ta yuwusan adanshi adama a Zamawawa, za na ri za vu ugundo u ro. Ko za diga o ugundo'o koto yuwan ulinga wā ʔgandā wa ganu a masa'a shi.

¹⁴ Za suru reve t̄a a na u t̄awai diga o ugundo wa Yahuza,† Musa damma ili i ro adama a ganu ʔtsumā o ugundo u ndolo shi.

Zamawawa t̄a tsa Malkisada

¹⁵ ʔyi nda ɗashi t̄a ut̄a a alanga e eteshe ana tse enei ganu ro t̄awai tsa Malkisada.

¹⁶ Vuma ndolo e ɗe yi ganu adama a nkaya mā yi ko adama ʔ wil̄a shi, amma e ɗe yi t̄a ganu adama a na ili i ro yi lo i na yaa gura zuwa wuma wā yi u koto shi.

¹⁷ Adanshi ʔ ʔsul̄a a yuwan t̄a adanshi adama ʔ yi,

“ʔvu ganu ɗa babu ukotu, cine vu revei Malkisada.” ◇

¹⁸ A zuwa t̄a akuci ʔ wil̄a ʔ nge'en, adama a na u ri nu ucira shi, waru ili ye pere i ɗa.

◇ 7:17 Ica 110:4.

19 Wilā wa Musa u gura zuwa ili i ro yi ntsaa shi. Amma gogo Asulā a ca tsu tā ili i sa'ani ya abunda lon i ro i na tsa zuwa okolo. Ne da tsa rawai zuzu na Asulā.

20 Asulā a kucina tā na Zamawawa aa dāna ganu babu ukotu, agba u yuwaan ganu ro akucunu a nda shi.

21 Yesu da goon u dammai:
 “Amu Asulazuva, n yuwan tā akucunu a nda, waru maa vadala okolo a va shi.
 ‘Avu ganu da babu ukotu.’ ” ◇

22 Yesu da za na zuwai akucunu a nda o o'woi amayun, akucunu a na la'ai za na Asulā a yuwain na Musa.

23 De nu ufaru, na ganu kuwa, waa lyuwa elime nu ulinga wa ganu shi. Ayi da i zuwai nan ganu a dānai lo abunda.

24 Amma Yesu o'wo tā ganu babu ukotu, tsuganu tsa yi tsa ri n koto shi.

25 Adama o ndolo, ayi da za na ri lo gogo, waru mantsa suru, za na aa gura wawa aza a na a tawai ubata wa Asulā e ekere a yi. U tā dāna wuma mantsa suru adama u yuwusaan le ipati ubata wa Asulā.

26 Yesu da cu'un va aabara a nan ganu na tsu cigai, adama a na u ta kambusa tsu o ure suru. Ili i na waa yuwusan u to yo'onotosu Asulā okolo. U ri nu unusu shi. Asulā a kakasa yi tā na aza a na a ri o uvadi aza a na aa yuwusan unusu. Waru Asulā a ca yi tā ubata u na u la'ai tsugbain suru suru zuva.

27 U ri tsa akapi a nan ganu shi, aza a na a casu kucci usana suru adama a nusu le, waru adama a

nusu va ama. Amma Yesu yuwan t̄a ayi ndolo u t̄a adama a mantsa suru na u cayi aciyayi kucci a akpata.

²⁸ Wilā u damma t̄a ama o tso o'wo t̄a abara a nan ganu, ko na wo o'woi aa gura yuwan cine wu ntsayi a yuwan shi. Ili yu ufaru, Ḃsulā a ca t̄a Musa Wilā. Ana a yuwain ne, reve u zuwa Mawun ma yi mo o'wo aabara a nan ganu na akucunu. Ayi Ḃa za na gura yuwain ili i na Ḃsulā a ciga niyi u yuwan suru.

8

Kristi Zamawawa Ḃa aabara a nan ganu a tsu

¹ Ayi nda ayi Ḃa ili i gbain i na tsa'a dansa: Tsu t̄a na aabara a nan ganu na tsu Ḃanu o ukere usa'ani wa Ḃsulā Mogono me Ili Suru.

² Aabara a nan ganu'u u ta yuwusan ulinga u tsuganu ubat̄a wu Upasu u na u La'ai Akizaƙ suru suru, ubat̄a wa amayun wa agandā a na Ḃsulā a yuwain, agba ama a Ḃa a suwa niyi shi.

³ Aabara a nan ganu suru a t̄a nu ulinga wu ucasu wu ne'e nu ucasu u kucci a tyo Ḃsulā. Adama o ndolo aabara a nan ganu tsu fo u 'yuwan u ciga u ca Ḃsulā ili i ro.

⁴ Nnu u shi pa o uvaḂi, u shi o o'wo ganu shi, ko ke'en, adama a na nan ganu a t̄a pa, a na o tonishi Wilā a casu Ḃsulā ne'e.

⁵ Agandā a na nan ganu aa yuwusan oroci o ululu wi ili i na i ri zuva Ḃa. Unat̄a u Ḃa u ri cine u Ḃanai na Musa. Ana Musa Ḃanai e ifoḂi i na waa yuwan Oogodo o Ucuwusan, Ḃsulā a damma yi t̄a, “Vu cuwan ana vu Ḃanai zuva masasan, n

damma wu t̄a cine vaa yuwan yi. Vu yuwan yi cine n damma nuwu foyi.” ◇

⁶ Amma ulinga u tsuganu u na Ḃsulā a cayi Yesu u la'a t̄a ulinga u na a cayi akapi a nan ganu. Ne ḁa waru, akucunu a sa'avu a na Yesu t̄awayi diga a Ḃsulā a t̄yo ubat̄a wa ama a yi u la'a t̄a za vu ufaru. Adama a na ana Ḃsulā a yuwain akucunu a sa'avu, ili i na u dammai waa yuwan u la'a t̄a ili i na u dammai waa yuwan a akuci a akucunu.†

⁷ Nnā akuci a akucunu a gura t̄a yuwan ili suru na wu ntsayi a yuwan, ili yi lo na yaa zuwa a yuwan za ve ire shi.

⁸ Amma Ḃsulā na aciyayi, ana we enei ama'a a gura kuru akuci a akucunu'u mejege shi, ḁaḁa u dammai:

“N ta dansaa ḁu, mantsa mo t̄a lo a t̄awā,
ana maa yuwan akucunu a sa'avu,
na ama o u'wa wa Isra'ila na ama o u'wa wa
Yahuza.†

⁹ Akucunu a nda ḁa ḁana
tsu za na n yuwayin nkaya n le shi,
ana n guzā nle ekere
reve mu ut̄a le e idā ya Masar.†
Amma a 'yuwan t̄a o toni yi,
avu n vadala le ucina.

¹⁰ Amma, apa akucunu a sa'avu a na maa yuwan na ama a Isra'ila a mantsa ma na maā t̄awā:
Ḃmu, Ḃsulazuva, n ta zuwa wilā u vā a asuvu e le,
adama e reve le,
waru n ta ḁana le at̄sumā o okolo e le,
adama a kuru le.
N to o'wo Ḃsulā e le,
ele waru o to o'wo ama a vā.

◇ 8:5 Mta. 25:40; Mta. 26:30.

11 Ama aa dashi rito ama e le, na nron mu nden n le shi,

adansa, 'I reve Asulazuva,'
adama a na ama'a suru e te reve mu,
diga a zawa'a a tyo a zagbain le suru suru.

12 N ta yuwaan le gafura vu ili i wuya i na a yuwain, waru maā dashi cuwan na nusu le shi, ko ke'en." ◇

13 Ana Asula a yuwain adanshi a akucunu a sa'avu, u to rocosu u yuwan ta de za vu ufaru waru wo o'wo ta ili ye pere. Waru ili i na i kutsai de hali u kporoi suru u ta puwan babu usan.

9

Akuci a wila adama a aganda

1 Akucunu† o ufaru a na Asula a yuwayin aza a Isra'ila, u damma ta ama cine aa yuwaan yi aganda waru u damma le ta cine aa yuwan Oogodo o Ucuwusan,† ubata u na aa yuwan aganda.

2 A shuwa ta oogodo a na a yuwain asula e re. A aasula o ufaru pe da wisawatan u fitila u ri, ni irika, no opopofu a na a cayi Asula. Reve e de aasula a nda Upasu wa Akiza.†

3 Waru umuna u dana ta pe u na u ne'eshein asula e re'e. Reve e de aasula e ire Upasu u na u La'ai Akiza.†

4 Pe da masa'a† ma danai, za na a palai na zinariya, ubata u na a tsu kulato ili i maguru. Waru pe da a zuwai Akpati a Nzuwulai† a akpata, za na a palai na zinariya e ebele suru. Ili i ta'atsu i dana ta pe atsuma a Akpati'i: Za vu ufaru, upondo u zinariya u na o shitoyin na mana.† Za ve ire,

◇ 8:12 Irm. 31:31-34.

aadanga a Haruna† za na topoi. Za va ta'atsu, atali o ushe'un aza a na a danai na Wila Kupa de ufanu.

⁵ Zuva va Aakpati'i a ruma ta ili i wuma i re de i na i tsu roco a na Asula a ri lo.* A kpatu ta ikpatatsu ya Aakpati'i ne evelu e le, ubata u na Asula a tsu yuwan gafura vu unusu. Agba tsaa gura damma ili suru adama e ili i nda gogo shi.

⁶ No o koto mofobo me ili tsundolo, nan ganu a tsu uwa ta a aasula o ufaru usana suru adama a yuwan ulinga u le.

⁷ Agba aabara a nan ganu a da goon tsu uwa a aasula e ire, agba u tsu uwa ta u ta atsuma a aa'wan. U tsu uwa Upasu u na u La'ai Akiza babu mpasa shi. U tsu ca ta kucci vu mpasa'a adama a nusu va yi, na nusu na ama a yuwain atsuma o ulambu wu urevu.

⁸ Ili i nda suru ure u da na Ruhu va Akiza aa dansa nna Oogodo o Ucuwusan a buwa ubata u da u na aa yuwusan aganda, koto a kpatu'wa ure a uwa Upasu u na u La'ai Akiza shi.

⁹ Ayi nda iroci i da i mantsa mo gogo. U to rocosu ne'e na kucci na a casu aa gura zuwa za na a yuwusan aganda u reve asuvu a yi a ta cece cine wu ntsayi shi.

¹⁰ Adama a na ili i ndolo suru wila wi ilyalya i da ni ili yo oso na wuzau. Wila u ndolo suru adama a lipu a da, waru Asula a zuwa ta ama o toni le hali a tyo mantsa mo ure u sa'avu wa yi.

Mpasa mu Zamawawa

¹¹ Gogo Zamawawa da o o'woi aabara a nan ganu suru a aci e ili i sa'ani suru i na i tawai de. U

* **9:5** Aruma a yuwan ta ulinga wu uruma. Na Tsugana a tsu de le ta "kerubobin."

uwa ta ubata wa aganda a zuva za na la'ai ulobonu suru suru, za na ekere a ama a da a yuwan niyi shi, waru u ri pa atsuma o uvaɗi u nda shi.

¹² U ta o una u mantsa suru u tarai mpasa a uwa ubata'a, agba mpasa mu mgbele ko ndindim n da shi. U tara ta mpasa ma yi, waru ana u yuwain ne, daɗa u tsupaa ntsu adama e iwawi i na yoo koto shi.

¹³ De nu ujimu, ana ama a danai nu unusu, lipu le tso o'wo ta cece na ganu kyo'onuwo le mpasa mu mgbele na za vo ogono e inan, na a bulanuwa le okomo a anawu a nan na a kulato.

¹⁴ Agba Zamawawa yuwan unusu shi, ko ke'en, reve u ca aciyayi kucci e ekere a Asula nu ure u Ruhu na ri lo babu ukotu. Ayi da i zuwai mpasa ma yi n ri nu ucira lon, reve wu za'wa asuvu a tsu diga a linga na tsu tawaa nu ukwa. Adama tsu yuwayin Asula a wuma aganda!

¹⁵ Ayi nda ayi da i zuwai Zamawawa o o'woi za na gerei akucunu a sa'avu, adama aza a na Asula e deyi a ushi aba'un a na oo koto shi, aza a na Asula a yuwayin nzuwulai. Ayi nda ta gura o'wo adama a na Zamawawa kuwa ta, reve u zuwa ama o o'wo faan diga a nusu na a yuwain ele o tono akucunu o ufaru.

¹⁶ Akucunu tsunda a ta gashi vuma na yuwain idana a aavu'un cine u cigai e ne'eshen utsuru wa yi nu u kuwa. Amma she na za suru reve ana vuma'a u kuwai daɗa a tsu ne'eshen utsuru'u.

¹⁷ Avu'u'un u ta nu ucira na vuma na dana niyi'i u kuwa. Ko za lo a gura ushi ili i ta atsuma e le shi, na vuma'a u buwa wuma.

18 *Āyi* dā i zuwai akucunu o ufaru ili i ro i dā shi, she nā mpasa adama u roco ukwā.

19 Wu ufaru, Musa damma t̄a ama Wilā suru. We ire, reve u tara mpasa mu mgbele nā mudindim reve u jāmbārā mpasa'a nā mini. *Āvu* u tara eleme e ikyon a na a sukumayi mini mā shili *āvu* u bōlo yi no oosondori† adama u kyo'onuwo aatagada ā Wilā na ama suru.

20 Reve u damma, “*Āyi* nda *āyi* dā mpasa n na n zuwai Akucunu a na *Āsulā* a damma ndū i yuwan tsutoni nā *āyi*.”

21 Ne dā waru, Musa kyo'onuyi mpasa'a o Oogodo o Ucuwusan† waru ni ili i na a yuwusayin agandā suru.

22 Wilā'ā u damma t̄a a 'yuwan a ciga ili suru o kyo'onuwo le mpasa adama ā dānā cece. Waru *Āsulā* aa yuwan gafura vu nusu babu wocowu wu mpasa shi.

Ukwā wu Zamawawa u tawa t̄a nusu

23 *Āyi* dā ili i na i zuwa nle ā kambuwai Oogodo o Ucuwusan cece ni ili i na i ri pe suru nā mpasa mi inama. Ili i nda suru oroci e ili ya amayun i na i ri zuva dā. Amma kucci† na kambatōi ili ya amayun cece dē zuva a la'a t̄a kucci vi inama.

24 Zamawawa uwa Upasu u na u La'ai Akiza na ama a yuwain ne ekere e le shi, za na ri ululu wi ili ya amayun. U kārā t̄a ā tyo zuva waru u t̄a dē oōlo nā *Āsulā* adama u kamba tsu.

25 Waru u kārā ā tyo zuva adama u dāshi cayisa kucci va aciyayi shi, gashi aabara a nan ganu vu uvadi na tsu uwa Upasu u na u La'ai Akiza a aa'wan suru adama u ca kucci vu mpasa vu nama.

²⁶ Nu u shi u ca kucci va aciyayi aa'wan suru, a na u sowo ta atsumalima na abunda diga a mantsa ma na a yuwain uvadi. Amma, u tawa ta u ta, zuzu na mantsa mo ukosu, o una u mantsa suru, adama u tawa ucira wu unusu suru suru ana u kuwai tsa kucci adama a tsu.

²⁷ Za suru u 'yuwan u ciga u kuwa u ta, na ayi ndolo koto, Asula e te ge'eto yi.

²⁸ Zamawawa kuwa ta u ta adama u tara nusu va ama a abunda. Agba nu u tawisa, woo o'wo adama a matawa mo unusu shi. U ta tawa adama u wawa za suru na ri lo a pura yi.

10

Aa dashi yuwan kucci ro shi

¹ Wila wa Musa u ta gashi oroci o ululu e ili i sa'ani i na i ri lo a tawa. Ayi ululu u nda ayi da ili ya amayu'un shi, adama a na waa gura zuwa ama a na a yuwusan aganda o o'wo cine wu ntsayi shi, ko na wo o'woi a tsu ca ta kucci aa'wan suru.

² Nna Wila u gura kambato asuvu e le cece cine wu ntsayi, ana a lyawa ta de mayan ma kucci. Ana Asula a shi ta a za'wa nusu va aza a na a yuwusan aganda, waru asuvu e le a shi a ri n cuwusan na nusu le shi.

³ Agba ne da u ri shi! Ayi kucci nda tsu zuwa le ta a cuwan nusu le a aa'wan suru.

⁴ Adama a na mpasa mo ogono e inan na mgbele maa gura tawa nusu shi ko ke'en.

⁵ Ana Zamawawa tawai atsuma o uvadi, u damma ta Asula,
“Vu ciga kucci vi inama na ne'e vi ishina shi.

Amma vu ca mu t̄a lipu adama n yuwan tsutoni n̄a
āvu.

⁶ Inama i na āa kul̄atosu a masa'a†
waru n̄a ne'e adama ā nusu tsu yo'onoto wu okolo
shi.

⁷ Reve n damma, 'Apa mu nda,
n t̄awa t̄a n yuwan ili i na vu cigai, Āsula,
cine a danai adama ā vā ātsumā a Adanshi ā
Āsula.' ” ◇

⁸ Ātsumā a Adanshi ā Āsula a nda u fara t̄a
damma, “Vu ciga kucci n̄a ne'e shi. Vu ciga kucci
vu ukul̄atosu shi, n̄a kucci adama a tawa nusu shi.
Waru v̄aa uwwusa uyo'o u le shi.” (Ele nda kucci
da suru na Wil̄a u zuwai a yuwan.)

⁹ Reve u damma, “Apa mu nda, Āsula, n t̄awa t̄a
adama n yuwan ili i na vu cigai.” Adama o ndolo
a da Āsula a tawai akuci ā kucci suru, reve u zuwa
kucci vu Zamawawa o un̄a u le.

¹⁰ Adama a na Yesu Zamawawa yuwain ili i na
Āsula a ciga niyi u yuwan, tsu tsurā t̄a wuza'u diga
ā nusu tsu adama a na u yuwan t̄a kucci n̄a lipu vā
yi u t̄a o un̄a u mantsa suru.

¹¹ De nan ganu a tsu yuwan t̄a ulinga u le usana
suru, reve waru a lyuwa elime nu ucasu u kucci
na aa tawa nusu shi.

¹² Amma Zamawawa† ca ta aciyayi kucci na
ntsayi babu ukotu. Gogo u t̄a nden o ukere usa'ani
wā Āsula.

¹³ Waru u t̄a danu de hali she n̄a Āsula a zuwa
n'yuwatan mā yi zālā vu ucira vā yi.

¹⁴ Kucci t̄a ndolo, u zuwa t̄a ama o o'wo cine wu
ntsayi ā dan̄a babu ukotu, ele da aza a na Āsula a
zuwai o o'wo aza a akiza.

◇ **10:7** Ica 40:6-8.

15 Ruhu va Akiza fo damma tsu ta adama a nda.
Wu ufaru u damma:

16 “Asulazuva a damma ta, ‘Ayi nda ayi da aku-
cunu

a na maa yuwan ne ele a mantsa mo ndolo.

N ta zuwa wilā u va o okolo e le,

adama e reve le.

Waru n ta dana le a asuvu e le,

adama a kuru le.’ ”

17 Reve u dammisa:

“Maa dashi cuwisan nusu le ni iwuya i na a
yuwain shi, ko ke'en.” ◇

18 Na Asulā a yuwan gafura vu nusu, ili yi lo
waru na yaa zuwa a yuwisan kucci ro shi.

I lyuwa elime nu ucasu wo okolo

19 Adama o ndolo ama a va, tsu ta gura uwa
Upasu u na u La'ai Akiza† babu wovon adama a
mpasa ma Yesu.*

20 U ca ta lipu va yi adama u kpatu'waa tsu ure
u sa'avu u na u tsu 'yawato ubata u wuma! Waru
ure u nda u tsu pasato tsu ta nu umuna'a.

21 Tsu ta na aabara a nan ganu a gbain za na a
yuwusan tsugono o u'wa wa Asulā de zuwa.†

22 Adama o ndolo tsu ta gura rawa zuzu na
Asulā. Lyawa tsu yuwain ne no okolo a ta nu
ucawu wo okolo a abula. Mpasa mu Zamawawa
mu za'wa ta asuvu a tsu a na tsu cuwan ni iwuya i
na tsu yuwusain, amma a za'wa tsu ta na mini ma
na ma ri kiza-kiza suru suru.

◇ **10:17** Irm. 31:33-34. * **10:19** Ayi umuna wu kasa ta Upasu wa
Akiza nu Upasu u na u La'ai Akiza atsuma o Oogodo o Ucuwusan
na Aa'isamapada. U karalai ta mantsa ma na Zamawawa kuwai
adama u roco Asulā a lyawa ta ama a tawa ubata wa yi mejege.

23 Nā tsu 'yuwan tsu ciga tsu guḡa uzuwu wo okolo a na tsaa dansa tsu ṭā nā ayi ulobonu, adama a na Ḃsulā a ta yuwan ili i na u yuwain nzuwulai.

24 Lyawa tsu ḡanāi aḡa ā azā a tsu, reve tsu kamba nle tsarā o roco icigi, waru adama a yuwan ili i sa'ani.

25 Ozo o ro ā tsu ṭawusā ubaṭā wā aḡandā kuci shi, amma she tsu yuwain ne wan. Tsu lyuwai elime nā ndashilāi mo okolo ugbamu, a na wo o'woi i reve ṭā urana u maḡambaā ma Zagbain ma ta yuwusan zuzu.

26 Nā tsu dangwa tsu lyuwai elime nā mayan mo unusu cina ḡe tsu reve amayun, kucci lo waru na aa yuwan adama ā nusu tsu shi.

27 Amma ili i na i buwai goon ayi ḡa she tsu piriya uge'etosu u na u ri lo ā ṭawā nā wuna u na aa lungusā n'yuwatan mā Ḃsulā!

28 Nna ama e re ko ama a ta'atsu a yuwunlai adanshi a na nanza 'yuwain o toni Wilā wa Musa, a ta gura ca vuma ndolo aṭsumalimā hali u kuwā babu uro.

29 Nā vuma yuwan ili i na yoo roco u ca Mawun mā Ḃsulā tsugbain shi, u la'a ṭā uwuyan u lon nā cine aa 'yuwan a yuwan tsutoni nā Wilā wa Musa. Agba waru, nā vuma ṭawaā mpasa ma akucunu nā wono za na tsu kambatō tsu na akiza,† u la'a ṭā uwuyan u lon nā cine aa 'yuwan a yuwan tsutoni nā Wilā wa Musa. Ne ḡa waru, nā vuma isula Ruhu va Akiza, za na o rocosu tsu isa'ani, iwuya i ndolo unṭā u ḡa na akapi.

30 Tsu reve ṭā a na Ḃsulā a dammai, “N ta ca aza a na a nusain oforo. N ta tsupa le.” Waru u damma

tā fo, “Asulazuva e te ge'eto ama a yi.” ◇

³¹ Ili i wovon i ḏa lon vuma riyā e ekere a Asulā a wuma.

³² I cuwan nā rana ndede, ana i fara revei amayun a Asulā. I yuwan tā mpolo nā atsumalima lon, reve gba i lyuwa elime nu ucira.

³³ A mantsa mo ro a amaton ḏu tā reve waru e isula ḏu a maḱaḱan mo obolo a ama. A mantsa mo ro i kamba tā fo aza a na o sowuso cu'un va atsumalima'a.

³⁴ I roco tā isa'ani a tyo ubatā wa aza a na a zuwai o u'wa wa ali. Ana a usai ili i na i ri ne ele suru, i yuwan tā asuvu nā mazanga, adama a na i reve tā na ili i sa'ani i ro i tā lo a pura ḏu na yoo koto shi.

³⁵ Adama o ndolo, she i lyawa cine i zuwayi Zagbain ucira wan, ko ni ili i ro i shi i fara, adama a na ni i lyuwa elime a zuwusaa yi ucira, i tā ushi iliyinkapa i gbain.

³⁶ Gogo i rito makaḱa ma asuvu, adama i gura yuwan ili i na Asulā a cigai, tsara waru i ushi ili i na u yuwain nzuwulai.

³⁷ Cine Adanshi a Asulā a dammai,
“Waa jima shi za na ri lo a tawa u ta tawa.
Waa lungusa mantsa shi.

³⁸ Ama a na Asulā a ushiyi a ta yuwan wuma adama o ucawu wo okolo e le.
Amma u tsu yuwan tā atsumolangu
nā za na ronoi aḱapa.” ◇

³⁹ Amma atsu aza a na o tso rono nā aḱapa ḏa shi, aza a na aa lungusa. Tsu ca tā Asulā okolo a tsu, adama o ndolo, u wawa tsu tā.

11

Ucawu wo okolo

¹ Aza a na a casu Asulā okolo e reve tā na amayun a na a ta ca le īli i na a zuwai okolo suru. E reve tā na amayun e ili i na koto e enei shi ā tā lo na amayun.

² Asulā ā usu tā ama o ufaru adama o ucawu wo okolo e le.

³ Tsu tā nu ucawu wo okolo, dāda tsu revei na Asulā a yuwain adanshi, waru nu ure u nda u dā u yuwain uvaḍi ni ili i na i ri pe. Asulā a yuwan tā ulinga ni ili i na vuma tse ene shi, tsarā u yuwan ili i na tsee ene.

⁴ Habila† dānā tā nu ucawu wo okolo, dāda u yuwayin Asulā kucci na la'ai kucci na Kayinu† cayi Asulā. Reve Asulā a damma wu uwwa tā uyo'o wu une'e u na u cayi, reve u dēyi vuma vā ābula. Ko na wo o'woi Habila kuwā tā dē nu ujimu, wuma wā yi u buwa tā a yuwusaan tsu adanshi adama o ucawu wo okolo ā yi.

⁵ Anuhu dānā tā nu ucawu wo okolo, dāda Asulā a tara niyi ā tyo zuva adama u kuwā wan. E ene yi shi, adama a na Asulā a tara yi tā ā karā. Adanshi ā Asulā a damma tā kafu a tara yi ā tyo zuva, u zuwa tā okolo ā Asulā o yo'ono.

⁶ Za lo o yo'onoto Asulā okolo shi, she nu ucawu wo okolo. Za na āā tawā ubātā wā Asulā biti u 'yuwan u ciga u usu na Asulā ā ri wuma, waru u tsu ca tā iliyinkapa ā tyo aza a na a zama yi na amayun.

⁷ Nuhu† dānā tā nu ucawu wo okolo, dāda wu uwwai ana Asulā o rono niyi atsuvu a aci e ili i na koto we enei shi. U yuwaan tā Asulā tsutoni reve u she'en wantsun u gbain adama u wawa u'wa wā

yi. Nu ucawu wo okolo ayi a ɗa, Nuhu rocoi uvadi na a nusain. Hali wo o'wo vuma ta atsuma a ama a na a danai na abula e ekere a Asula adama o ucawu wo okolo a yi.

⁸ Ibrahim dana ta nu ucawu wo okolo, dafa u yuwain tsutoni ana Asula e de niyi u 'yawa ubata u ro u na u yuwaan niyi nzuwulai n na waa ca yi. U lyawa ta ida ya yi, agba u reve ubata u na wee tyo shi.

⁹ Adama a na Ibrahim ri nu ucawu wo okolo, reve u yuwan nden n limocin e ida i na a yuwaan niyi nzuwulai. Reve u danu de o oogodo, ne da fo Ishiyaku na Yakubu aza a na a danai muwun mu ugundo ma yi. Asula a yuwaan le ta fo nzuwulai'i.

¹⁰ Ibrahim yuwan ta ne adama a na u ri e ipiri i na waa uwa a lyuci gbain na Asula o foboi waru u suwai na waa dana lo babu ukotu.

¹¹ Saratu ofolo na Ibrahim a dana ta nu ucawu wo okolo, dafa a tsurai mawun, ko na wo o'woi a shi ta a kutsa lon, waru Saratu idari i da i shi. Ibrahim usu ta a na Asula aa yuwan ili i na u yuwain nzuwulai n na waa yuwan.

¹² Vuma nda shi ta kutsa suru suru, u shi ta u rawa makuwaa, amma ko na ne avu wo o'wo akaya a ama a abunda a na a gura kece shi. Amayun, a ta lo na abunda cine italyo'o ya zuva i ri ko tsu mabula ma nge'en m mala.

¹³ Ama a nda suru a na a danai nu ucawu wo okolo, a kuwa ta babu na a ushiyi ili i na Asula a yuwaan nle nzuwulai. A dana ta na mazanga ma na ee ene ili i ndolo a tawa, ko na wo o'woi a dana zuzu shi. Avu a damma a na a ta gashi omocin na aza e ida i ro atsuma o uvadi u nda.

14 Nna ama a yuwan cu'un va adanshi a nda, o to rocosu a ta zamishi ure wi ida i na wo o'wo za le.

15 Na a shi a adanshi e ida i na a lyawai, babu ili i na yaa putsale a na aa kamba.

16 Amma a dana te izami yu ubata u na u la'ai ulobonu. U ta de zuva. Ayi da i zuwai Asula a tsu uwwa wono shi nne e de yi Asula e le, adama a na u fofo le ta lyuci gbain.

17 Ibrahim ◇ dana ta nu ucawu wo okolo, dada u cayi mawun ma yi Ishiyaku tsu kucci ana Asula a lyungwa niyi. Ibrahim da vuma na Asula a yuwayin nzuwulai'i, amma u fofo ta u ca mawun ma ta ma yi goon tsu kucci.

18 De nu ufaru, Asula a damma yi ta, "Mmaci n na n yuwaan nuwu nzuwulai a ta o uta ya Ishiyaku."

19 Ibrahim jiyanta na Ishiyaku kuwa, Asula a ta gura kambato yi wuma waru. Ne da Ibrahim yuwain, reve u yuwan gashi u ushiyisa ta mawun ma yi diga o ukwa.

20 Ishiyaku† dana ta nu ucawu wo okolo, dada u zuwayi muwun n re ma yi aba'un, Yakubu na Isuwa.† U reve ta na Asula aa yuwaan le ili i sa'ani elime.

21 Yakubu† dana ta nu ucawu wo okolo, dada ana waa kuwa, u zuwayi muwun ma Isuhu koyan da aba'un. Reve u yuwaan Asula aganda ayi ukadatuwa a aadanga a yi.

22 Isuhu dana ta nu ucawu wo okolo, dada i zuwai ana waa kuwa, u yuwain adanshi adama a

◇ 11:17 Ufr. 21:12.

mantsa ma na aza a Isra'ila aa lyawa Masar. Reve u damma le a tara etele a yi nna aa kara.

²³ Nshawu ma Musa n dana ta nu ucawu wo okolo, dada a gura soko niyi hali woto ta'atsu ana a matsan niyi. E ene ta Musa mawun ma sa'ani ma da, waru a uwwusa wovon u na aa 'yuwan yuwan tsutoni na wila u mogono shi.

²⁴ Musa dana ta nu ucawu wo okolo, dada i zuwai ana u kungwai, u 'yuwain a na e de yi mawun mo usheli u mogono ma Masar.

²⁵ U dangwa ta u sowo atsumalima obolo na ama a na Asula a dangwai, a na waa uwwa uyo'o u mayan mo unusu a mantsa ma wa'a.

²⁶ U jiyana ta u la'a ta ulobonu u sowo atsumalima o unu wu Za na Asula a Dangwai, a na waa tsura utsuru wa Masar suru, adama a na u dana ta a pura iliyinkapa ya Asula i na i ri lo a tawa.

²⁷ Adama o ucawu wo okolo a yi, Musa lyawa ta Masar, agba u dana a uwwusa wovon wu upan u mogono shi. Musa kaba ta asuvu adama a na u zuwaa ta Asula a na aa gura ene shi esu.

²⁸ Adama o ucawu wo okolo a yi a da, u foboi Abuki a Mapasa† reve u kyo'onu mpasa e ebele na gon vu nantsu, adama a za na aa tawaa nu ukwa wu una muwun mu ufaru mo olobo ma aza a Isra'ila wan.

²⁹ Ama'a a dana ta nu ucawu wo okolo, dada a pasai Mala ma Shili† gashi ida yu u'yewu. Amma ana aza a Masar o toni nle, reve mala ma lyuwa le suru.

³⁰ Ama a Asula a dana ta nu ucawu wo okolo, dada ana a kandaruwusai lyuci va Jeriko rana cindere, avu ukari wa yi u riya.

³¹ Rahaput̄ aashakala a dāna tā nu ucawu wo okolo, dāda u ushiyi aza a Isra'ila aza a matawa mo utyo. Ayi dā i zuwai o una niyi shi, ana o unai aza a na a 'yuwain a yuwan tsutoni nā Asulā.

³² N dashi tawā ni iroci i ro? N ri nā mantsa ma na maa damma dū ada o Gidiyon,† nā Baraka, nā Samuson,† nā Japuta, nā Dawuda, nā Sama'ila,† na akapi a amasulā shi.

³³ Ucawu wo okolo e le u zuwa le tā a lyuwa aci e ida i ro ya abundā lon. A yuwan tā ili i mejege, reve a ushi ili i na Asulā a yuwain nzuwulai suru. A baru tā nā vi ikamu.

³⁴ A kimusā tā wuna u na u tsu lungusā. A fātsa tā e ekere a aza a na a dānai azama o una le nā mutsun mu pe'eni. Ko na wo o'woi a dāna tā babu ucira lon, a tsurā tā ucira. A dāna tā nu ucira ubāta o uvon hali a lyuwa aci o uvon o omocin a asoja o ro babu uro.

³⁵ Amaçi o ro waru a ushiyisā tā mmaci n le a na a shi a kuwāi reve a kambisā wuma. Ama o ro gba ozo o ro a ca le tā atsumalimā adama o ucawu wo okolo e le, reve gba a usu le, “Tsaā usu tso o'wo faan cine i dammai shi!” A yuwan tā ne adama Asulā a 'yasan le atsumā o ukwā a tyo a wuma u sa'ani.

³⁶ Ozo o ro o sowo tā ulamu, avu a faba le adama a na a cayi okolo ubāta wā Asulā, ozo o ro gba shi a nla le tā na akani reve a zuwa le o u'wa wa ali.

³⁷ Ozo o ro a kuwā tā adama a na a vara nle na atali. Ozo o ro gba shi a kuwā adama a na o kodulo nle tā ure. Ozo o ro gba shi o una le tā nā matsun me pe'eni. Ozo o ro a dāna ni ili i ro shi, she kwan vu mgbele n na aā nla. Alambi a ama a dā a dānai, reve e le'e le, waru o bongi le tā.

³⁸ Ama a nda a dāna tā ama a sa'ani agba uvadi u nda wu ntsaa le shi. A baza tā atsuma o una na a nsasan, reve waru a pa'an atsuma a abanu na a akari.

³⁹ Ama o ndolo suru o yo'onoto tā Asula okolo adama o ucawu wo okolo e le! Amma suru na ne, a kuwa tā babu na a ushiyi ili i na a yuwaan nle nzuwulai.

⁴⁰ Adama a na Asula a dangwa tā a na woo fofoo tsu ili i ro i na i la'ai ulobonu abunda lon. U fofo tā u yuwan ne adama she obolo na atsu goon da oo o'wo cece wuntsayi.

12

Asula a da Dada tsu

¹ Tsu tā na ama abunda ukandaruwu na atsu a na o o'woi iroci i na ucawu wo okolo u ri. Adama o ndolo lyawa tsu yuwain ala'anlai e iladi a na a ri a makakan ma tsu, she tsu kunai wan. Tsu tawai ili i na yee geshe tsu a yuwan ili i na yi ntsayi a wuma u tsu, ayi da, unusu u na waā tīgā tsu babu usan.

² Na tsu ciga tsu 'yuwan tsu kalyuwusa Yesu goon, za na ayi da ufaru wu ucawu wo okolo a tsu waru ayi da za na kambuwa niyi ununa wu ntsayi. U sowo tā atsumalima reve u kuwa a akpata.† Avu gba u ushi wono gashi ili i ro i da shi, adama a mazanga ma na waā tawa u tsura elime. Gogo tsunda u tā nden o ukere usa'ani o ootogu o tsugono tsā Asula.†

³ Yuwain majiyan me iroci ma Yesu. U kaḅa tā asuvu a mantsa ma na ama a wuya a yuwusaan yi iwuya. Adama o ndolo she i kuna avu i lyawa mpolo wan.

⁴ I ta yuwusan mpolo nu unusu, agba mpolo n ñu koto n zuwa o una ñu shi.

⁵ Agba yi icina ta ili i na Adanshi a Asula a dammai muwun ma Asula adama u gɓamato le asuvu:

“Mawun ma va, vu polo atsuvu a mantsa ma na Asulazuva oo ronuso wu atsuvu, waru she okolo a wu a kuɗa wan a mantsa ma na waa ɓarasa wu.

⁶ Adama a na Asulazuva a tsu ɓara ta za na suru u cigai, reve waru u ca aza a na u usuyi tsu muwun ma yi oforo.” ◊

⁷ I kaɓa asuvu atsuma atsumalima a na yoo sowuso adama a na u rotso ta oforo a na dada tsu ca mawun. Mawun mo lo ma na dada va yi tsu kuɗa a ca oforo shi. Asula a ta yuwusan na aɗu tsu muwun ma yi.

⁸ Asula a tsu ɓara ta muwun ma yi suru, agba nu u ɓara ñu shi, to, aɗu agirutu a ɗa, agba i ri muwun ma amayun ma yi shi.

⁹ Suru ntsu tsu shi ta na mbara pa o uvadi aza a na a ɓarasa ntsu. Reve gba tsu uwwusa le. To tsaa la'a uwwa Dada tsu na ri zuwa adama tsu danai wuma shi?

¹⁰ Mbara n tsu ɓara tsu ta a mantsa wa'a o ure u na e enei mejege. Amma Asula a ta ɓarasa tsu adama u kamba tsu, adama tso o'woi aza a akiza ununa u ri akiza.

¹¹ Tsuɓari ili i na ama a tsu uwwa uyo'o a mantsa ma na aa yuwusan yi ɗa shi, u tsu ɓali ta! Na Asula a ɓara le, ne ɗa, adama u roco le ubata u na a

◊ 12:6 Udm. 3:11-12.

nusain ɗa, ɗaɗa a tsu lapula reve a yuwan ili i na i ri mejege no okolo nden.

¹² I gbamato obolu a ɗu a na a kunai, reve waru i gbamato ɗu a ɗu.

¹³ I yuwan ure mejege adama a ana a ɗu. Ne ɗa aza a na oo tono ɗu akutsuma, na a taɗatsa, aa riya shi, amma a ta tsura ucira.

Uwwai Asula

¹⁴ I yuwan mpolo i yuwan nden n sa'ani na ama suru, waru i yuwan mpolo i yuwan nden ma akiza. Za na suru wuma wa yi u ri na akiza shi, wee ene Asula shi, ko ke'en.

¹⁵ I yuwan ugbozu she vuma lamba a ushi isa'ani ya Asula wan. I kambuwa ugbozu tsara nanza tawa ɗu na addama wan. Cu'un vuma ndolo ta lungusa ama na abunda atsuma a ɗu na abunda.

¹⁶ I yuwan ugbozu she nanza yuwan tsipere wan, ko u 'yuwan a kuru Asula ununa Isuwaɗ yuwain wan. Isuwa ayi ɗa mawun mo ufaru ma Ishiyaku, waru u shi ta ushi agadu a dada va yi suru, reve gba u wina yi adama u lyuwa ilyalya u ta.

¹⁷ I cuwan ta ana Isuwa yuwain ne, u shi ta u cigisa dada va yi zuwaa yi aba'un, amma dada va yi 'yuwan ta. Agba babu ili i na waa yuwan u vadala ili'i, ko a na u patiyi dada va yi na mesun.

¹⁸ I ri tsa ama a Isra'ila shi, aza a na a rawai a Masasan ma Sinai,† ubata u na ee ene reve waru aa gura ju'wan. U shi ta a kulusa na akina, a ɓaru yi ta ni irumbu i lima na lipa.

19 A uwwa t̄a mesun ma aavana nu uɗyo u ro. Ana ama'a a uwwai uɗyo'o, reve a pati Āsulā a lyawa adanshi,

20 adama a na u la'a t̄a ucira u na aa gura kuru ana u dammai, “Ko n̄a shi nama ɗa ju'wain masasa'an, na a 'yuwan a ciga o una yi n̄a mavara ma atali.” ◇

21 Musa na aciyayi wu uwwa t̄a wovon wi ili i na we enei ɗaɗa u dammai, “Mu uwwa t̄a wovon lon hali n te meje'en.” ◇

22 Agba gogo i t̄awa t̄a a Masasan ma Sihiyonaf waru n̄a Urishelima na ri zuva. Ayi ɗa lyuci gbain va Āsulā a wuma, ubata u na obolo obolo a nlingata ma Āsulā ma abunda lon m bolotoi adama a yuwan mazanga.

23 I t̄awa t̄a ubata e iɓolo i muwun ma Āsulā t̄a muwun mu ufaru ma yi aza a na a ɗanaɗi ala e le suru ɗe zuva. I t̄awa t̄a ubata wa Āsulā na aciyayi, za na ayi ɗa za va uge'etosu va ama suru. Waru i t̄awa t̄a ya kwisa va ama a sa'ani, waru Āsulā a kambato le t̄a cine wu ntsayi.

24 I t̄awa t̄a ubata wa Yesu, za na t̄awayi na akucunuf a sa'avu diga a Āsulā. Mpsa ma Yesu* n ɗa o kyo'onuyi t̄a kucci, za na ri ni ikaka i na i la'ai mpasa ma Habila.†

25 Adama o ndolo i yuwan ugbozu waru she i 'yuwan o polo atsuvu wan, n n̄a Āsulā a yuwan

◇ 12:20 Mt̄a. 19:13. ◇ 12:21 U.Wl. 9:19. * 12:24 Mpsa ma Yesu n tsu t̄awa t̄a n̄a gafura vu nusu, amma mpasa ma Habila n t̄awa t̄a n̄a atsumalima e ekere a za na una niyi (Ufr. 4:10). † 12:24 Ana Kayinu unai Habila, Āsulā a damma yi t̄a, “Mpsa mu zawa'a va wu n na n ri e ida n te dewu va (Ufr. 4:10).” Gogo tsunda, mpasa mu Zamawawa n ɗa maa yuwusan adanshi e ikaka i na i la'ai mpasa ma Habila.

adanshi. Ama a Isra'ila a na a vadala a niyi ucina ana u o rono nle atsuvu pa o uvadi, ko za la'a shi. Adama o ndolo u ta dana tsu uwuyanana tsu vadala a Asula a na a ri zuva ucina nu u rono tsu atsuvu.

²⁶ Ana u yuwain adanshi nu ujimu de aca, udyo wa yi u jingada ta uvadi, amma gogo u yuwan ta nzuwulai, "N ta jingadisa uvadi u ta waru, agba uvadi goon shi, hali na zuva." am

²⁷ Ana u yuwain adanshi a nda, u ta dansa a na ili i na u yuwain suru a ta lungusa le. She ili i na i ri n jingada shi, goon ele da aa buwa.

²⁸ Ayi da i zuwai tsu dana o godyusho a na tsu ushiyi tsugono tsa na ili yi lo a na wa jingada yi shi. Tsu yuwayin Asula aganda cine woo yo'onoto yi okolo, reve tsu ca niyi tsugbain avu waru tsu uwwai wovon wa yi,

²⁹ adama a na Asula a tsu akina a wuna u na u tsu lungusa ili i da.

13

Cine oo yo'onoto Asula okolo

¹ Ilyuwa elime na ncigalai ni icigi yi Zamawawa.

² I cuwan i ushi omocin ulobonu a 'wa du. Ama o ro a yuwan ta de ne, avu gba a ushi nlingata ma Asula babu ele urevu.

³ She yi icina na aza a na a ri pe o u'wa wa ali wan. I sowo atsumalima obolo ne ele gashi i ta de obolo ne ele. I cuwan na aza a na o bongiyi gashi adu fo i ta pe atsuma e le.

⁴ I ca nden n lolo tsugbain. Ka na vali a mantsa suru i guza amayun, adama a na Asula a ta ca za na

yuwain tsipere suru aṭsumalima, ko za na kuḍai a guṣa amayun aṭsuma a nden n lolo suru.

⁵ I guṣa aciyaḍu e icigi yi ikebe. I yuwan ankuri ni ili i na i ri na aḡyi. Aṣula a damma ta,

“Maa lyawa wu shi,

waru maa vadala a wu ucina shi, ko ke'en.” ◇

⁶ Adama o ndolo, tsu ta gura damma babu wovon,

“Maa uwwa wovon shi,

adama a na Aṣulazuva za vi ikambi i va i da.

A gura yuwan ili i ro na aḡmu shi.”

⁷ I cuwan na azagbain a du, aza a na o rito ndu Adanshi a Aṣula. I cuwan ni isa'ani i na wuma u le u taḡwayi, waru i ca okolo a du a Zagbain cine ele a yuwain.

⁸ Yesu Zamawawa aa vadala shi, ko ke'en! Ne da u ri tso yon, tsa ana'an, waru babu ukotu.

⁹ She vu lyawa a pusan wu ana wan, waru she vu lyawa uritosu icu'un icu'un i zuwa wu vu toni ure u wuya wan. Isa'ani ya Aṣula i da yaa dashi wu okolo ugbamu, agba e itoni i wila wi ilyalya i da yaa zuwa wu vu yuwan ne shi, ili i na yaa kambusa aza a na oo tonole shi.

¹⁰ Amma tsu ta na masa'aḡ mo ro, waru nan ganuḡ na a yuwusan aḡanda ubata wa aḡanda o uvadi u nda, a ri nu ucira u na a tama kucci na a cayi a masa'a ma tsu shi.

¹¹ Aabara a nan ganu a tsu tanu ta mpasa mi inama a uwa pe Upasu u na u La'ai Akiza ubata u na u tsu ca mpasa'a adama a nusu. Agba lipu vi inama'a a tsu kulato le ta a alanga o uvalata.

◇ 13:5 U.W.I. 31:6-8; Ica 118:6.

¹² Ayi da i zuwai Yesu sowoi atsumalima o ugyuru, adama u kambato ama a yi aza a akizaƙ na mpasa ma yi.

¹³ Adama o ndolo tsu karai a tyo ubata wa yi o ugyuru wu uwalata adama tsu uwwai wono u na wu uwwai.

¹⁴ Tsu ri na lyuci na aa dana lo babu ukotu o uvadi shi, amma tsu te ipiri i lyuci tsundolo.

¹⁵ Lyawa kucci tsu lyuwa elime a cuwusa Asula atsuma a ala e Yesu. Tsu casu ala a yi tsugbain.

¹⁶ She yi icina i yuwan isa'ani wan, waru i kamba ozo o ro, adama a na ele da kucci na oo yo'onoto Asula okolo.

¹⁷ I yuwan tsutoni na azagbain a du, waru i yuwan ili i na a damma ndu i yuwan. A ta kalyuwusa du babu wivuwun, adama a na e reve ta a na aa cuduwa Asula cine ulinga u le u yuwain. Ni i yuwaan le tsutoni, a ta yuwan ulinga u le na mazanga. Ni i 'yuwan gba a yuwan tsutoni ne ele, a ta yuwan ulinga u le na atsumolangu, agba ayi nda waa kamba du shi.

¹⁸ I yuwusaan tsu avasa kuci. Tsu reve ta asuvu a tsu a ta cece, waru tsu ciga ta tsu yuwan ili i na i ri mejege a mantsa suru.

¹⁹ N te ipati i du nu ucira u na n ri na ayi suru, i yuwan avasa adama Asula a kambato mu ya'a du kedu.

Avasa o ukosu

²⁰⁻²¹ N ta avasa Asula a asuvu nden u ca du ili i sa'ani i na i cigai biti adama i yuwan ili i na u cigai. U 'yasan ta Yesu Zamawawa Zagbain tsu diga o ukwa. Gogo Yesu ta tsu Za va Agu6a a Gbain a na aa yuwan ulinga na mpasa ma yi adama a

yuwan akucunu a Asula ni ikyon ya yi, akucunu a na oo koto shi. N ta yuwusan avasa Asula a yuwan ulinga atsuma a tsu adama tsu yo'onoto yi okolo e ekere e Yesu Zamawawa. Lyawa tsugbain tso o'wo za va yi suru suru waru babu ukotu. Ami.

²² Ama a va, n te ipati i du i kambuwa ugbozu e ikaka yu udashishi wo okolo o ugbaru u nda. Mepepeline ma abunda ma da shi.

²³ N ciga du ta i reve a na a lyawai Timoti za tsu diga o u'wa wa ali. Nu u rawa ya'a va kefu, tsu ta tawa ubata u du ra adama tse ene du.

²⁴ I casa azagbain a du suru na aza e Itoni suru. Waru aza e Itoni a Italiya a na a ri obolo na amu a te icasu i du.

²⁵ Lyawa isa'ani ya Asula i dana obolo na adu suru.

**Nzuwulai n Sa'avu na Tsishingini na adiva a
na a dangulai a Nzuwulai mu Ufaru
New Testament in Tsishingini (NI:tsw:Tsishingini)**

copyright © 2011 Wycliffe Bible Translators, Inc.

Language: Tsishingini

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tsishingini

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files
dated 29 Jan 2022

bb185c63-dc44-572c-ae93-66252c4dfa1e